

亢 藝 堂 集
小 草 庵 詩 鈔



定 本
學 堂
藏 書
印



亢

藝

堂

集

係廷璋 著

中華書局

亢藝堂集卷一

清 會稽孫廷璋連士著

古今體詩

題畫

大好鄉光入畫圖。水花風葉鏡湖居。滿庭桐桂茶初熟。自課兒童讀道書。

長安秋興寄伯兄二首

一枕西風夢不成。鄉心橫似亂雲生。天涯細柳傷貧賤。陌路誰堪託死生。小院夜闌聞落葉。破窗涼緊逼長檠。自憐作客曾非慣。淒絕中宵絡緯聲。

客路艱難始見真。滿階風露但傷神。庾郎棲託同鷗羽。蘇季音書仗雁賓。潦倒功名成氣短。飄零骨肉爲家貧。秋煙西望三秦樹。應共慚爲負米身。時伯兄宰秦之山陽山縣瘠苦未能迎養

出都後道中述懷

風雪關河一敝裘。吾生今日信行休。嘯鷗淡月商量夢。瘖馬酸風整頓愁。老去祇應看射虎。年來多已媿盟鷗。蚤知搖落今如此。悔別青山事遠遊。

曉行書所見

殘夢扶頭酒半消。一重霜氣溼簾腰。堠亭戍卒低吹火。野樹山僧早掛瓢。衰柳河橋猶有月。荒蘆邨港不能潮。鳳城回首鷓鴣侶。政合熏香賦早朝。

松濤

天風北來不到地。噴薄蒼龍作秋意。直疑倒海洗碧雲。中有江婁恣遊戲。是時密翠屯晝陰。肅然萬景天爲沈。須臾荇藻亂空際。可以橫卷湘江濤。或當跛腳臥夜館。風水霓裳夢久斷。忽漫寒瀾醒毛髮。此身未覺江海遠。我欲因之訪成連。一氣湊泊三山前。舉頭風定涼月墮。依舊石上胎禽眠。古來幾人真解此。山中宏景亦老死。卻誰翻入瑤琴端。笑殺北窗高臥士。

乙卯六月六日集小雲樓寄公房同周拜軒孝廉慶榮叔雲太史星譽李蓴客太常慈銘家子九秀才孩次少陵宿贊公土室第二首韻

蒼然泝湖陰。到寺水亦靜。北風墮詩許。聊復亂松影。鱸熏藹清微。趣與名理永。冰簟泛遠湘。雪銚煮寒井。商歌互間作。煙好無異秉。吾生坐寡能。夢落江海迴。豈不慕攬轡。笑人懼清潁。竭來遠公社。初喜不吾屏。攜尊竟蕭晨。冉冉月生嶺。溼雲渡水來。涼透鷺絲頂。

擬李長吉美人梳頭歌同叔雲蓴客子九作

冰帳瀟雲香拂曙。紫鳳驚寒隔煙語。紅粧夢墮梨花春。殘黛茸茸漬煙雨。縷金袖窄春鸞迴。迷離倦影臨瑤臺。嬾雲積處凝塵怯。照影初驚素波狹。軟匣銀鋸一再行。翠鬢亂與春愁繁。玉梁壓霧香帖妥。寶釵徐

試春風聲。掩筇秋心渺何許。按花媚影慵無主。燕脂艷絕堪奈何。不惜金鈿爲君舞。

秋莫讀尊客邨居雜感詩輒賦四章

萬里秋筇暮。西風接地來。壯心空灑落。殺氣尙崔嵬。豪傑疑天意。江山笑將才。陸沈千古恨。蒼莽入新哀。誰聚神州鐵。憑將錯鑄成。邊才今屢借。豎子總無名。廢壘枯燐語。春田繡鐵明。九原公等在。何以謝蒼生。萬古風雲氣。低徊入劇緣。此生渾未卜。與爾一悲秋。立馬河山覺。聞雞歲月遒。難忘根觸處。何止誤恩雠。不盡中原感。創夷惜未遑。江湖驕敗卒。村里戒餘糧。江左思陶謝。朝端慕孔桑。天心眞悔禍。事業政茫茫。

駝峰觀日出歌同尊客作

仙藥不來祖龍死。蓬萊一峰乃在此。此邦地僻接左藏。天策靈鼈屹然止。去天一握有絕頂。晦霧陰風起其趾。我來剛值秋昊霽。極眼橫空九萬里。是時海門潮始落。海氣沈沈浸寥廓。倚天四顧心茫然。太白一星墮芒角。須臾紫蓋排青空。若有閭闔生長風。想見六驪馭羲后。一氣奮迅開鴻濛。下如溫犀逼水室。上如雷劍騰星宮。始如元珠出罔象。俄如赤水銜燭龍。盡追元氣攝萬有。雪物浩浩從之東。乾坤清穆有此景。唐虞揖讓將毋同。我生不逢堯舜禪。鬱鬱萬古摧心胸。天假絕境憑倦目。頓覺俯仰猶爲雄。人生百年但未盡。安必運會無遭逢。爾來有賊在海內。不日天討昭成功。大明開堂受朝賀。天子謙讓慙眇躬。羣臣固請藏玉牒。上追七二垂無窮。既登泰山上日觀。云亭梁父皆升中。東巡次第至吳會。臣請此山宜當封。雨夜懷寄雲上人芝社同尊客得雨字

寒意赴暝色。凍澀琴上語。虛帷黯春星。亂沙響疏雨。西窗耿危夕。清寤香共煮。蕭寥百年心。蒼生仰使。何當就元賞。同飲晦堂乳。

擬陶徵君田居同叔雲蓐客素人季貺作

暄風暖平疇。嘉穎萎已縛。負耒及茲辰。生事良可弼。醫醫榆柳間。植杖紛遠矚。積景倏造晚。墟煙吞歸轡。人生各有營。政爾求所欲。相期歲功茂。春醪亦既熟。偃息撫塵勞。黃農此焉足。

題畫

草衣家法傳宗女。粉墨飄零二百年。此派幾時傳浙水。眼中難讓許張先。

爲同年陳晝卿孝廉題其亡婦鏡香女史遺草

錦瑟生塵已十年。人間難覓掌書仙。絳河一去無消息。留下芙蓉密字篇。
晝卿居植利門之鮑家橋。

蓬飛雙鬢看揚塵。寫韻年來未佐貧。翻羨碧城歸去早。不知世有斷腸春。

秋日雜感

酒酣忽不適。根觸登高臺。天門亦咫尺。浩浩秋風來。造化誰辦此。與世爲百哀。陰雲鬱萬里。殺氣何崔嵬。其下多戰死。白骨縈紫苔。自從鼎湖去。日積昆明灰。癰潰誰所養。誤國首庸才。桓桓郭尙父。騎箕竟不回。憂勤貽廟堂。未惜穀屨推。移軍或開府。詔書必親裁。授鉞爲上將。專閫無疑猜。征募遍諸道。算緡急於雷。

微勝張首級。殊錫出上台。傳言侍中貂。峨峨逼輿儼。至竟兒戲略。但聞堅城頽。今年棄湘漢。明年失江淮。朝聞兩河破。夕報三晉摧。齊魯千餘里。卷地無蒿萊。神京亦震蕩。中原何有哉。蒼生實何罪。浩蕩罹此裁。亡者日山積。血肉厭虎豺。存者能幾何。生意如枯荄。虛耗在閭里。國計必與偕。朝廷於赤子。如民保其孩。一旦不並活。爲計當析骸。元氣日淪喪。滔天方未涯。

雨中出城訪尊客則出游南湖諸寺矣次日東寄

春陰市地雨騎月。新漲拍天城枕湖。有時輕齋就窮艇。想見練帶懸微壺。茶煙寺寺水楊柳。邨瀑崦崦山鷓鴣。題詩到處窮屐齒。吁嗟謝公今豈無。

和友人無題

雲英最小掌中身。花裏交推第四春。第四春見陳後山芍藥詩人道孫孃惟善顰。誰知越女卻工曠。阜紗自恨生難裹。翠袖何曾苦已貧。玉鏡溫郎真自誤。鴛鴦尙復咎何人。

不怨潘郎素髮催。茫茫深意屬憐才。後堂願入扶風帳。前席欣邀卻月杯。雙鳳屢輕纔可點。九鸞斂重不勝撻。如何人似圓蟾麗。相見曾無十二回。

重門春黯隔花稠。相訪居然得上樓。繡架日長橫蠹簡。羅幃煙靜控鴛鉤。手按裙帶渾無請。眼送簾衣漸近愁。猶有去年癡絕事。坐闌寒夜看梳頭。

唱斷驪駒一曲歌。論心始各悔蹉跎。莫言今後難忘甚。已覺從前可感多。三絕暗憐癡願愷。六時苦憶病

維摩狂生自合泥犂墮。欲懺情天奈爾何。

向日心情道近愁。誰知幽緒逼春羞。書來珍重終千萬。話到溫柔只二三。玉縱尙全售已誤。石如能望化

還甘。傷心語語頭終讀。比勘都增薄倖慙。

漫道青谿未有郎。眼看黃竹打成箱。預愁輪轉風中絮。不忍箏彈陌上桑。韋女再生終恁悅。宓妃一意最

徬徨。早知洛浦相逢左。不合當時少主張。

腸轉車輪各自驚。心如棋局豈能平。人間使自無金屋。天上還曾有玉清。奔月君能輕匹耦。泛湖我願厭

功名。癡心低祝雕陵鵲。莫管他生管此生。

下階同指月纖纖。天畔猶嗟不易圓。相勸從今須散誕。自知無益愈纏綿。一生所悔將卿誤。九死難酬得

汝憐。釋盡狐疑交甫意。尙防風語逗人前。

難問高樓第幾重。此心空逐夜潮東。書期慎重翻多闊。夢怪模糊未必同。瘁羽分飛禽共命。愁絲自縛繭

同功。錦囊羅帕牢收定。一檢牀頭一懷儂。

天上瑤姬是女孫。固應精彩化朝雲。瑤姬天帝女。精彩化朝雲。本太白詩。春生陽朔逢初度。月比華年恰二分。虛羨衛姬兼

五可。偶呼崔女作雙文。要知別後相思意。芍藥花開最憶君。

依倚桃花阿母旁。當筵初見玉卮孌。娉婷名字眞珠小。掠削身材錦瑟長。姑射仙人肌是雪。昭陽女弟體

原香。儘能淺步沈香屑。恨少齊奴百琲償。

剛道心安卽是家。錦帆何意又天涯。君心松柏山中樹。本香山詩妾淚芙蓉水上花。本東野詩憐母今猶歌捉搦。惱

雜憶七絕句

珍亭蘭夜散笙歌。銀燭香塵一隊過。趨近畫羅團扇底。那時心上爲郎何。
絲竹前廳淺醉歸。笑聲只隔一重帷。直教看過梳頭去。耐徹寒宵卻爲誰。
雲旂迎到杜蘭香。筵底私分豆蔻湯。記得褰簾門外送。重來低約蜜梅黃。
青粉牆西翠幙開。晚妝剛值下樓來。靈犀可惜遲猜透。不喚驚鴻首一回。
背牆難饒一百鞭。何圖慳吝破神仙。一雙翦與檀奴去。知否儂心與指連。
頗恃才能賦錦鞵。疏狂便敢乞爲椽。魂銷金縷南唐樣。不得親提剗轆來。
無端別恨值春殘。衆裏盈盈欲語難。一霎心情都莫定。纔回屏側又憑闌。

雲栖禪院留題二絕

丈室天花倚翠屏。定中之聲落秋冥。鬢絲舊感都除起。聽諷蓮華小品經。
十載重參竹屋燈。戊申年曾宿寺中棲閒心諾了無憑。明朝又踏江聲去。苦憶南廊打睡僧。

應辟赴五河軍中舟夜不寐作短歌一首卽題日記卷端

食其腐儒合遭罵。樊宏書生甯習兵。惘惘出門可憐色。茫茫對此無限情。西風滿江飄長纓。江水爾亦胡

不平歸來求得北府酒。醉汝一洗蛟龍腥。

從軍五河道經邗上食蟹有作

黃中十載滿天地。江淮殺人血如洗。城頭日落胡笳酸。旋風如刀鬼爲厲。扁舟獨夜邗江濱。湖西賊退無兼旬。空涇蘆花泣燐火。斷陂菰米沈寒雲。江鄉蕭條那可說。獨有霜螯賤如昔。老漁性命賊口餘。夜捕西風去。餐客書生身手劇可憐。豈能殺賊先諸賢。江頭十日風雨惡。孤征仗劍心茫然。左斫雙螯右持酒。臥看秋星大如斗。封侯萬里行焉求。一飽其餘復何有。將軍今夜鏖敵圍。擊鮮釀酒歡如雷。荒江無人霜月白。我與諸君遙舉杯。

昨夜惕息不得眠。眞憂從中來。不可斷絕也。占七律寫之。

草草離亭酒一樽。布帆眞已下吳門。裹頭痛飲孤兒淚。落魄羞蒙國士恩。戍堞雲黃驚旅雁。戰牆風黑拜江神。十年重省扁舟路。家國蒼茫不忍論。

江行遇雨迷不得道泊荒港中

空灘響交蘆。遙天墮平楚。津亭不辨色。孤纜鎖江雨。勁寒肅精魂。頑黑警遙語。颯然枯炬燼。山鬼相爾汝。眞宰變寥廓。萬象入慘沮。平生睡夢事。直用堅忍取。息倪還吾眞。雲霧天亦曙。開門見白鷗。昨夜宿何許。洋河道中寫懷。

暢好清秋碧玉卮。蘇臺十日醉楊枝。卻拋銀甲彈箏夜。來逐黃皮縛袴兒。江上魚龍愁戰伐。山中猿鶴怨

奔馳封侯第一歸來早。莫到章娘宛轉時。

申江感遇

巢痕難認十年前。今日登樓感仲宣。番市樓臺融蜃氣。妓場簾幙散龍涎。江潭獨夜吟山鬼。海島何時葬水仙。珠履此邦空佇想。春申古隧闕荒煙。

上督帥湘鄉相國師

我朝景運實奇勦。豈惟世德深涵濡。太祖太宗始締造。戎衣未及混八區。萬年神器歸世祖。時猶石紐間。啓呱入關從此定。郊廓乾鏐方盛遊。鼎湖聖祖膺圖並沖幼。海內新定危疑俱。庶頑煽亂禍實及。一朝詔定真神謨。岐嶷相繼定垂創。二祖首出鴻荒無。嗣是累葉享清宴。厥或不靖隨討除。屬當先帝初祚日。乃有化字遊緄綸。世習承平弛兵革。天苦生齒資芟鋤。遂令斧底假餘息。不惜寓內流毒痛。東南喋血數千里。封豕所觸無堅郭。先帝憂勤十一載。遺恨未遂吞三吳。天以多難啓後聖。詔書哀痛稱閔予。豈非靈穹有成格。眷命特與二祖符。卽今御宇未數月。氣象駿肅已自殊。首殛共鵠靖堯陛下拜風收。凝軒圖廟堂。蒸蒸日向治。豈憂齊斧稽鯨魚。默推興運天久造。先五十載生鉅儒。恭維我師挺名世。忠孝文武資楷模。早膺特達在宣廟。舟楫已爲今皇儲。咸豐二年賊始橫。突出象桂馳潯梧。明年長驅破建業。遂以建瓴爲負隅。公時銜恤在閭里。忠勁奮發雄萬夫。援江保鄂有成績。柳營紀律人難如。先帝晚年信愈篤。始假黃鉞頒彤弧。從來闔寄關社稷。老臣籌策誠宜紆。此寇披猖久盤固。翦葉未足摧根株。虓虎雖猛在善制。搃

吭何必憂其餘。賊今臂翼恃全皖。內蔽心腹旁張舒。不爭此道入鞭辟。控制在敵謀終疎。公既受詔默定策。視賊命脈加剔劓。力爭上流遂得勢。盡收旁郡如拉枯。比聞全師逼城下。旦晚入穴殲厥渠。以次迎刃解吳越。著手無用紛追遁。譬如橫流絕觴濫。縱有膏溢皆潢汙。蠢然此輩難盡殺。導以隴畝爲委輸。公之南征事乃定。然後袞繡還上都。國家寇盜固爲害。猶人有疾纏肌膚。惟賴元氣善補救。疾且易失加充腴。所以調燮事尤大。其效以漸功以需。公且手定外亂訖。政應萬物當昭蘇。大廷枚卜信有主。成命潛與貞元孚。聞公昔年位卿貳。久以正色彈匡扶。疏抗鈞衡有密勿。議獻郊配成都俞。聞公比歲領征討。愛數萬卒如嬰孤。雖有枵腹飽忠義。臨敵氣盡吞於菟。聞公殺賊最矜慎。降散無一遭駢誅。手成歌詞檄衆賊。賊脅從者心歌呼。聞公戎幕盛才俊。薦之清廟皆璠璣。其尤傑出並開府。隨公絡繹清天衢。賤子所得僅耳食。十年恨未從公趨。身名瓠落叢怨謗。井邑蕪廢遺邨墟。塗窮屢欲訣妻子。家亡轉悔存形軀。天親終古已失倚。溝壑豈問今何辜。蒼生如我政無算。盛頌咸待公下車。拜手獻詩實自賀。喜將與世遊唐虞。皋廣翳贊行有述。韓碑柳雅奚足摹。還看報政返東第。太平經世編成書。舉今助伐炳衛霍。度公滿志猶躊躇。

滬上贈陳珊士比部 壽祺 三首有序

余避地入滬。值珊士乞假尋親。浮海至比。念家山之已破。得旅語於故人。累欷之餘。聊一破涕。惟余厲脫豺牙。枯登駟轍。既自悲秦川之非吾土。復不得臯橋以爲主人。靜言平生。不偶非一。豈因宋玉微詞之累。遂有深源怪事之書。魍魎喜人。鴟鵂嚇我。史公之傳貨殖。徒峻龍門。賈傳之擬離

騷行悲鵬舍。牢愁未已。禍亂相驅。杜鵑爲望帝之魂。青繩作虞翻之弔。搏沙聚散。原屬何常。阿璧
光陰。尙能幾日。故人訣矣。作詩五章。多拉雜自寫。而美君將母之役。爲可風也。時壬戌五月。

咫尺烽煙滿故園。滄桑遺事更何論。客中不意君先在。亂後還驚我尙存。逆旅奇逢寧夢幻。敝廬遙望各
聲吞。只憐舊日高陽伴。貧到難除酒一尊。
艱難十口戰中來。漫信從今脫禍胎。通客姓名憎樵櫟。腐儒性命賤蒿萊。但遭饑餓猶奇福。不學居沽總
廢才。千載要離吾欲傍。卻教荷鍤仗誰埋。

乾坤莽莽欲何之。憂患年來髻盡絲。廿已文章吹馬耳。誤同謠詠中蛾眉。殺身原未傷吾道。棄物無端值
聖時。努力諸公麟閣上。不才報答只能詩。

空持絮酒醉春中。蹣跚江潭到日曛。瞬得死投乾淨土。政堪生諡杳冥君。春心蜀魄三更淚。罪草湘纍九
辨文。畢竟功成還蹈海。魯連多事卻秦軍。

萬里尋親事可傳。風濤不問死生懸。功名何忍慚清夜。盜賊終由棄性天。豈有帝心難鑒汝。能充君類足
安邊。吾今亦受橫流禍。請爲蒼生贈此篇。

珊士招飲酒樓歸誦君詩。卽題其集用卷中往年倒和鄙人食蟹詩韻。

爲君一飲三百杯。枯腸芒角收飢雷。歸來讀詩破醉膽。偏師敢奪長城圍。陳登豪氣無不有。烏帽狂歌拍
銅斗。騎驢花市散直回。狼籍使才如使酒。海內兵氣方囂然。落拓難爲王公賢。一官將母苦不足。飢死羞

乞朱儒憐。我復懷君同舍客。駿骨仍聞夢如昔。漢廷揚雄強解嘲。謂周叔雲秦邸蘇君徒獻策。謂李尊客
未到官二君皆與君都中同宅沉我飄泊同孤雲。百指旅餓常兼旬。與君今日尙握手。明日拋骨空江濱。還君詩卷益淒
厲。請君詩腸倒江洗。麒麟高塚今特多。政恐埋詩少餘地。

亢藝堂集卷二

古今體詩

滬上喜遇潘椒坡

介繁

卽送其重還鄧尉山中并序

今年四月余避亂滬上。知椒坡先已入鄧尉山中。飢懣不得遇。更兩月。余有騎省之戚。旋臥病繩床。短檠熒熒。稚女相守。忽呻忽嚔。自謂無期見期。而我椒坡竟至。喜極嗚咽。不知涕之何從也。既幸故人能來。病亦良已。作長歌貽之。篇中追撫昔款。殆難爲懷。嘗自卒讀。益恨恨涕不可仰。君行復還舊山。兼卽相送。所恨喪亂以來。懷抱可想。猝搆斯事。手重五斤。加以逆旅塵穢。直如給札。瀟瀟間。庚申外史云。情知春草池塘句。不到柴煙糞火邊。固宜蕪音累氣。重爲隱侯病矣。君故見癖嗜。將又謂味似鰕魚耶。適望見欄衫。黽紛肩隨。若匹耦。跚跚然坐主人簷下。隙陰。左手拍青竹板。右搖臂作撇捩狀。相與度爲曼聲。無何曲終。市上人笑釀之錢以去。度是人如是。更數番可使飽腹。野臥而我燃髭數斷。始能跳出一篇。飢火正煎。持此曾不換杯水。以視拍竹坐簷下。須臾博市人錢者。不如也。不如也。執是以論。便工何爲。并舉似椒坡以爲何如。

前年手折閨門柳。側帽花前醉君酒。驚心別後却灰飛。此際不知君在否。去年聞爾浮洞庭。全家貸賊真再生。五湖三畝攝追騎。間道夜走春申城。今年我亦浮家至。期君各訴蒼涼事。胡爲掉頭重入山。蕭瑟江

關空寄意。我來海上百茫茫。忍飢不已還悼亡。病人窮鬼苦相搏。自分與爾終參商。牀頭昨夜燈花喜。私
慰來朝病當已。何期一刺故人來。下牀走迎脚不履。咄嗟握手瞿心顏。爾何黧黑吾蒼髯。都疑邂逅成隔
世。何堪譚笑追昔年。昔年並轡蘭臺走。馬稍清談好身手。池上君殊有鳳毛。花間我每從犀首。中郎阿大
盡能文。細唾輕衫總出塵。曼歌自按紅牙尺。醉墨分題白練裙。花萼筵中盛賓客。柘枝我覺頗尤劇。狂隨
隄上唱銅鞮。醉便壚旁眠錦瑟。玉河濯濯好楊枝。最是何戡絕妙時。但怨班雕送油壁。不辭絳蠟寫烏絲。
花遊別有東風眷。屈戌銅鋪鎖春燕。文園買賦酒錢盡。屯田下第詞名偏。是時兵氣滿炎荒。殿上求衣夜
未央。安危自仗諸公策。痛哭何消我輩狂。鵠立銀袍同聽點。年年唱操和春餞。遨頭自笑送人忙。提舉政
愁難汝免。京洛縹緲厭客裾。秋風一夜憶尊鱸。祇餘爽懋戀西山。笏不願官求北府。廚君遡南鴻潞河曲。我
亦凌冬理歸軸。衛公舊築洛陽園。司空新買王官谷。所嗟水路自迢迢。從此相思隔暮濤。卻掃終年稽呂
駕。撫塵長闊尹班交。人事歡娛有銷歇。阿連春草風前折。入室君嗟子敬琴。比隣我愴山陽鑿。痛心俄共
泣。皋魚荏苒光陰隙過駒。君儘羅囊賭諸父。我誰葛屐恤遺孤。誓墓初心遂成阻。飄零書劍仍何補。鼓吏
奚庸擅賦才。參軍徒爾工蠻語。時事身名等陸沈。雍門彈畢足酸辛。九歌屈子遭讒日。五憶梁生遊亂身。
海邑翕然聲利藪。依舊朱門能炙手。毋乃程羅氣太尊。反令許郭名居後。不然如爾亦胡憂。閨閤才華盡
上流。王粲無家猶貴介。邵平累世是通侯。爾尙棲棲憐鳳泊。何怪鰥生合遼落。縱聞虛左待侯嬴。徒冀長
鳴逢伯樂。鬻春垂簾未有方。漫從詹尹卜行藏。難期海上栽黃竹。只擬齋前種白楊。自傷重復傷君別。仍